



Datë: 11.12.2025
Numër Protokolli: 7973/2025

A.nr.1750/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Malsore Gashi Bajraktari dhe Eshref Shabani, anëtarë, me Avdyl Bekteshi, në cilësinë e procesmbajtësit, në procedurë sipas ankesës me numër A.nr.1750/2025, të datës 01.10.2025, të parashtruar nga ankuesja I.N, kundër organit të punësimit: Komunës së Prishtinës, në çështjen juridiko-administrative “*kërkesë nga marrëdhënia e punës*”, duke vepruar në pajtim me nenin 6, paragrafi 1, nën paragrafi 1.1, nenin 16, paragrafi 3 dhe nenin 18, paragrafi 1, nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, më datë 11.12.2025, mori këtë:

V E N D I M

Hedhet poshtë si e palejuar ankesa me numër A.nr.1750/2025, e datës 01.10.2025, e parashtruar nga ankuesja I.N.

A r s y e t i m

Nëpunësja civile I.N (*referuar tutje vetëm ankuesja*), më datë 01.10.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, ndaj moszbatimit të Vendimit të datës 13.12.2024, të Kuvendit të Komunës së Prishtinës për pagesën e shujtave për vitin 2024.

Këshilli i Pavarur Mbikëqyrës për Shërbimin Civil të Kosovës (*me tej Këshilli*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, ka proceduar kërkesën për përgjigje në ankesë tek Komuna e Prishtinës, ndërsa, kjo e fundit ka përcjell përgjigjen në ankesë së bashku me shkresat referuar çështjes në procedurë.

Kolegji për Shqyrtimin dhe Vendosjen e Ankesave ka administruar këto prova: Ankesën me numër të protokollit 6473/2025 të datës 01.10.2025 e parashtruar nga ankuesja në Këshillin e Pavarur Mbikëqyrës për Shërbim Civil të Kosovës; Kontratën e punës për kohë të caktuar e datës 08.07.2024; Kopjen e ID-së së ankueses; Vendimin për Kompensimin Vjetor për Financimin e Ushqimit për Punëtorët e Administratës së kryeqytetit i datës 13.12.2024; Ekstraktin e Procesverbalit të mbledhjes së Kuvendit të Komunës së Prishtinës; Kërkesën për përgjigje në ankesë e datës 10.10.2025; Përgjigjen në ankesë e datës 23.10.2025.

Kolegji për Shqyrtimin dhe Vendosjen e Ankesave pasi ka shqyrtuar provat materiale të parashtruara nga palët në procedurë, konstatoi se ankesa e ankueses, **është e palejuar, sepse**

Nga administrimi i provave materiale rrjedhë se ankuesja është e punësuar në komunën e Prishtinës dhe së e njëjta mban pozitën *Zyrtar i lartë për Arkitekturë*.

Ankuesja ka parashtruar ankesë në KPMSHCK për moszbatimin e Vendimit të datës 13.12.2024, të Kuvendit të Komunës së Prishtinës për Kompensimin Vjetor për Financimin e Ushqimit për Punëtorët e Administratës së Kryeqytetit. Shton se Komuna e Prishtinës nuk ka zbatuar Vendimin e datës 13.12.2024 ndaj zyrtareve të punësuar sipas kontratave me afat të caktuar, ndërsa, ndaj zyrtarëve të punësuar sipas kontratave me afat të pacaktuar janë duke e realizuar me përmbarues. Kërkon që të urdhërojë Komunën e Prishtinës që të zbatojë Vendimin për Kompensimin Vjetor për Financimin e Ushqimit për Punëtorët e Administratës së kryeqytetit dhe të kompensojë me shumat përkatëse për shujtat për vitin 2024.

Kolegji i Këshillit në kuptim të pranushemrisë së ankesës ju referua nenit 27, paragrafi 3 të Ligjit Nr. 08/L-197 për Zyrtarët Publikë, ku është përcaktuar: “3. *Nëpunësja/i civil ka të drejtë të paraqes ankesë në Këshillin e Pavarur Mbikëqyrës të Shërbimit Civil të Kosovës për çdo veprim apo mosveprim, që i cenon të drejtat apo interesat e ligjshme, të drejta këto që burojnë nga marrëdhënia e punës në shërbimin civil*”, si dhe nenit 124 të Ligjit Nr.05/L-031 për Procedurën e Përgjithshme Administrative me të cilin parashihet se: 1. *Pala ka të drejtë të ushtrojë mjetet juridike administrative ndaj çdo veprimi apo mosveprimi administrativ, nëse pretendon se të drejtat apo interesat e saj juridike cenohen nga ky veprim apo mosveprim,..*” dhe si rrjedhojë, nisur nga ky përcaktim ligjor, dhe duke u bazuar në administrimin e provave material të çështjes, Kolegji erdhi në konstatimin se ankuesja lidhur me realizimin e të drejtës në kompensim sikurse në ankesë nuk ka parashtruar kërkesë të organi përkatës i punësimit, dhe për pasojë nuk kemi veprim apo mos veprim administrativ të organit të punësimit e që pretendohet se mund të ketë cenuar të drejtat apo interesat e ligjshme të ankueses.

Rrjedhimisht, në kuptim të së drejtës së ankueses në mbrojtje juridike, Kolegji thekson faktin se ankuesja fillimisht duhet t’i drejtohet organit të punësimit me kërkesë për realizimin e të drejtës se pretenduar, dhe vetëm kundër aktit për refuzimin e kërkesës apo kundër heshtjes se organit publik në raport me kërkesën e parashtruar, mund të parashtrojë ankesë në Këshillin e Pavarur Mbikëqyrës për Shërbimin Civil të Kosovës, duke respektuar afatet ligjore siç parashihen me nenin 127 të Ligjit Nr.05/L-031 për Procedurën e Përgjithshme Administrative.

Theksuar si me sipër, e duke u bazuar në nenin 18, paragrafi 1, nën paragrafi 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të këtij vendimi.

KËSHILLË JURIDIKE: Vendimi hyn në fuqi në ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë–Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda: A.nr.1750/2025

Avdyl BEKTESHI

Procesmbajtës

Ardita Haxhnikaj DEMI

Kryetare e Kolegjit

Vendimi i dërgohet:

- Ankueses znj. I.N;
- Udhëheqësit të Burimeve Njerëzore në Komunën e Prishtinës; dhe
- Arkivit të KPMSHCK-së